

Baibo Buga Oleleesu 1.

Gode Osobo Bagade Hahamoi Sia:.

Baibo Buga Sia: Yenesa Sa:bida 1 amola 2 amola.

Musa musa hemolega osobo bagade Gode ea degabo hahamoi.

Osobo bagade hahamobeba:le, ha:a:no amola gasii amola fawane dialu.

Gode ea A:a:siilliibu Ida:iwane gala ha:a:no da:iya gadodili lalu.

Gode amale sia:i, "Soge haadigi misa." ea sia:i. Sia:beba:le haadigi osobo bagadega misii. Amalalu Gode maga hamoi galu. Haadigi da Eso dio ea asulii. Gasii da Gasii dio ea asulii.

Eso ageyadu ganodini, Gode mu amola osobo fii ilia miifo hamoi galu.

Eso osoda ganodini Gode ha:a:no gilisiili amo ea sia:beba:le osobo oga bagade ha:a:no dogua ganodini bihai. Amabeba:le osoboga e Osobo dio asulii, amola ha:a:no bagade e Sii dio asulii. Amalu Gode sia:beba:le, osoboga gisi amola ha:i manu liligi amola ifa amola huluane heda:i. Liligi noga:i ba:a:beba:le, Gode ea hahawane ba:a:i.

Eso biiyadu ganodini Gode sia:beba:le e eso amola oubi amola gasumuni amola, haadigi ima:le, muagado ligisii. Ea hamoi e hahawane ba:a:i.

Eso biiyale ganodini Gode ea sia:beba:le,

menabo fii e ha:a:no ganodini hamoi galu. Gue eso ganodini amola e sio fii huluane hahamoi. Ea hamoi e hahawane ba:a:i amola ilima amale sia:i, "Gilisiili gouwali amola aseme amola noga:a:le fiima. Dilia maano laalelegemuba:le osobo bagade nabama."

Eso gafeyale ganodini Gode ea sia:beba:le, ohe fii amola gebo amola bulamagau amola sibi amola hiibu amola sania fii amola huluane ea hahamoi.

Ea hahamoi e hahawane ba:a:i. Gue eso ganodini e dunu fii amola hahamoi galu. Dunu Gode aguane e hahamoi galu. Gode osobo gasa:a:le, guda:a:le ganumugiili, dunu hahamoi. Amo nonogoole ea miifo hiigili ii.

Gode dunuma asigiba:le amale sia:i, "Dunu afadafawane esalumu da defea hame gelebe. Na fiidiisu hahamomu gelebe," ea sia:i.

Amaiba:le Gode ea sia:beba:le, dunu e golaale, ea didifi Gode bosonawane uda hahamoole amo A:do e golai nedegiili, hiigili ii. Musa dunu ea dio amo A:do amola musa uda ea dio amo Ibi amo. Amasia Gode seema hamoi aguane, dunu da uda lasia, ea ada amola ame amola yolesiili, e amola ea uda amola, huu afadafa hamomu.

Amalalu Gode ea sia:beba:le, A:do e ohe fiima dio asulii. Gode amale sia:i, "Na aligili ha:i manu liligi huluane ii dagoi. Ali da ohe fii amola sio fiima hiinawane esalumu." Ela gilisiili

noga:a:le fiima:le, amola maano bagohame  
laalelegema:le, Gode elama sia:i. Ela da degabo  
mae gogosiaane nabadowane esalu. Ea hahamoi  
ba:a:beba:le, Gode hahawane ba:a:i.

Eso lobo fasele ganodini Gode mae hamoole  
helefii galu. Amaiba:le e helefiibeba:le e maga  
legei. Eso afadafa hiialigiili ganodini da  
helefiisu eso, Godema nodoosu iaasu eso aguane.

1. Eso agega haadigi hahamoi.
2. Eso ageyaduga mu amola fo amola hahamoi.
3. Eso osodaga e ha:a:no gilisii. Gilisiili, Gode ea sia:beba:le osobo heda:i. Amalalu e gisi amola ifa:amola ifa fage huluane ea hahamoi.
4. Eso biiyaduga Gode eso amola oubi amola gasumuni amola hahamoole, muagado ligisii.
5. Eso biiga Gode hega fii amola menabo fii amola huluane ea hahamoi.
6. Eso gafega Gode ohe fii amola gebo amola bulamagau fii amola, huluane ea hahamoi. Eso gafega e musa dunu fii hahamoi. Dunu ea dio amo A:do. Uda ea dio amo Ibi.
7. Eso lobo faselega Gode hame hamoole helefii. Gode eso gafeyale ganodini osobo bagade amola liligi huluane ea hahamoi. Ea hamoi ba:a:siada, e huluane hahawane ba:a:i.

Dawa:louma:le Sia:.

1. Age.

Gode ea A:a:siiliibu ha:a:no da:iya asiili, Gode ea sia:beba:le, haadigi bagade osobo bagadega misii. Gode ea A:a:siiliibu Ida:iwane dunu ilia dogo ganodini hawa: hamosia, haadigi amola ilia dogo ganodini misunu.

2. Ageyadu.

Gode dunu hahamosia e da:i amola asigi dawa:a:su amola a:a:siiliibu amola, musa dunugili ii. Dunu

e Godema dafawaneyale dawa:ma:le, Gode  
a:a:siiliibu egili ii. Dunu ilia a:a:siiliibu mae  
bogoole, eso huluane esalalalumu.

### 3. Osoda.

Gode dunugili sagomusa: uda hahamosia, e A:do  
ea didifiga hahamoi. A:do amola Ibima amale sia:i,  
"Gilisiili fiima! Maano laalelegesia, ilia osobo  
bagade nabamu."

Amaiba:le ninia dawa:, uda laasu hou aguane  
hamomu da defea.

Uda afadafafawane lamu. Dunu e udama noga:a:le  
asigiili fiidiimu da defea. Uda e dunuma  
noga:a:le asigiili fiidiimu da defea.

### 4. Biiyadu.

Gode A:do amola Ibima amale sia:i "Na ifaabi  
(Idini soge) noga:a:le oualigima, noga:a:le hawa:  
hamoma.

Amaibale hawa: hamoosu hou da defea, ninia dawa:.  
Sia: Baibo Buga ganodini dedei diala.  
Yenese 1:32.

"Gode ea hahamoi ba:a:sia, e ida:iwane ba:a:i."

Baibo Buga Oleleesu 2.

Osobo Bagadega Dunu Ilia Daafai Eso.

Musa Wadela:i hou osobo bagadega misii

dawa:louma:le sia:.

Baibo Buga Sia: Yenesse 3:4-21. idima.

Musa dunuma Gode seema hamoi.

"Ha:i manu huluane manu defea. Be seema ifa fage afadafa fawane mae moma. Go nasia bogoosu amola wadela:i huluane osobo bagadega misunu." E amale sia:i.

Musa A:do amola Ibi ela da:i nabadowane mae gogosiaanewane esalu. Bogoosu amola da:i dioi hame dialuba:le, hahawane esalu.

Eso afadafa, Sa:idini, saniawane, Ibima misiini, amale sia:i. "Abole gue ifa fage hame nahabela:?" Ibi bu adoole ii "Gode seema hamobeba:le ani hame naha."

Sa:idini ea hou ogogoosu houba:le, e bu sia:i,  
"A! Gode ea sia: mae nabima. Gue ifa fage nasia  
ali hame bogomu, bagade dawa:mu, hiinawane  
esalamu," e ogogoolewane sia:i.

Amaiba:le Ibi bagadewane hanaiba:le, seema ifa  
fage ida:iwane ba:a:beba:le, seema ifa fage  
fa:iili mai. Egoagili iabeba:le, e amola laale  
mai.

Amalu nabeba:le, ela sii fadagaale, ela da:i  
nabado ba:a:beba:le, bagadewane gogosiaane sogega  
wamoaligii. Ifa luubi fa:iili, nodemele,  
a:bulawane idinigilisii.

Amasia Gode elama bagade weei, "Ali da habila:?"

A:do bu adoole ii, "Na diba:le beda:beba:le, na  
wamoaligii. Na da:i nabadoba:le, bagadewane  
gogosia:i."

Gode bu adoole ii, "Dafawane! Di seema ifa fage

fa:iili mai." Amasia A:do Godema amale sia:i, "Na uda di nagili ii. Hiisu fa:iili nagili ii."

Ibi amale sia:i "Sa:idini ogogoiba:le, na fa:iili mai dagoi."

Be Gode amale sia:i "Ali wadela:i hou hamoi. Na seema udigiili fii."

Amasia, Gode saniamama amale sia:i, "Defea! Di da wali hagogoba:le sugi masunu gelebe. Dia maano amola uda ea maano bagadewane gegelalumu. Uda ea maano dia dialuma da:iya osa:a:le heda:mu, be di da ea emo gafe fofonamamu."

Udama, Gode amale sia:i, "Dia maano laalelegesia seei bagade nabimu gelebe. Di amola digoagili fiimusa: hanaiba:le, e dia hiinawane esalumu."

Dunuma Gode amale sia:i. "Di da na sia: hame nababeba:le, di amola seei bagade nabimu. Ifaabasia, gagalobo bagohame heda:mu. Di da bagadewane hawa: hamomu gelebe, dia fiiniimu bagadewane masunu.

Amalalu A:do amola Ibi amola, ela Idini sogega eno sogega masa:ne, Gode sei fasii.

Ela Idini sogega bu mae misa:ne, Gode a:igele dunu amola gaiya lalu aguane ligisii logoga. Gode sibi maano medoole, ea maga:me osoboga sa:iili, ea gadofu houga:a:le, A:do amola Ibi amola ela da:i nabadoga idinigilisii.



1. Age.

Wadela:i Hou ea Heda:a:su Hou.

- Ibi (1) Ea siiga seema ba:a:i.  
(2) E da bagadewane hanai galu.  
(3) Hanaiba:le ifa fage fa:iili mai.  
(4) Egoagili ii.  
(5) Amaiba:le ela Gode ea sia: nabawane  
hame hamoi.

2. Ageyadu.

Ela Godema beda:iba:le, ela wadela:i hou dedebomusa: dawa:iou. Ninia wadela:i hou hamosia beda:mu gelebe. Be wadela:i hou Godema wamoaligimu da hamedei gelebe.

3. Osoda.

Gode sibi maano gadofu idinigimusa:, A:do amola Ibi elagili ii, ela da:i nabado dedebomusa:. Gue da bigisa aguane diala. Yesu Gelesu ea maga:me ninia wadela:i hou dedeboma:le, sogadigii.

4. Biiyadu.

A:do amola Ibi amola sibi maano ea gadofu laale, idinigisii dagoi. Gue amola bigisa diala. Ninia Yesu e ninima ga:ga:a:musa: dawa:sia, ninia Yesu ea hou laalegaguma da defea.

Baibo Buga Sia. Louma 5:12.

"Dunu afadafa e wadela:i hou hamobeba:le, wadela:i huluane osobo bagadega misii. Dunu huluane wadela:i hou dawa:." Bible Handbook No. 1